

Date : 19 Julai 2013
Title : Teroka ilmu di Korea Selatan
Publication : Utusan Malaysia (Gerbang akademik)
Page : 10



Teroka ilmu di Korea Selatan

'JAUH perjalanan, luas pengalaman'. Berpanduan peribahasa Melayu itu, Kolej Pengajian Asas dan Umum, Universiti Tenaga Nasional (Uniten) terdorong menganjurkan jelajah akademik ke luar negara bagi mendapat pendedahan dan penerokaan ilmu yang berkaitan teknologi kejuruteraan.

Korea Selatan, destinasi yang dipilih, sememangnya terkenal dengan pembangunan teknologi kejuruteraan. Bukan sehari dua, tetapi jelajah akademik yang disertai 29 orang pelajar Uniten itu memerlukan mereka berada di negara K-Pop selama seminggu bermula dari 10 hingga 17 Jun lalu.

Ekspedisi pendidikan yang merupakan salah satu inisiatif program pembangunan pelajar melalui Kolej Pengajian Asas dan Umum Uniten itu merangkumi lawatan ke universiti terkemuka di Korea Selatan iaitu Soongsil University, Korea Advanced Institute of Science and Technology (KAIST) serta Far East University.

Soongsil University adalah universiti tertua di Korea Selatan dan terletak di tengah-tengah bandar Seoul. Universiti berkenaan menempatkan artifak yang sangat bernilai serta kaya den-

gan sejarah budaya masyarakat Korea, manakala lawatan ke KAIST di Daejeon pula memberikan pendedahan dan pengetahuan mengenai penggunaan teknologi yang terkini serta pemahaman mengenai kaedah pembelajaran di institut berkenaan.

Sementara itu, sesi perkongsian ilmiah antara kumpulan ekspedisi pendidikan Uniten dengan wakil Far East University Di North Chungcheong turut diadakan. Menerusi sesi itu, para peserta telah diberi taklimat mengenai universiti serta program akademik kejuruteraan yang ada di universiti tersebut.

Selain melawat universiti, para peserta juga berkesempatan untuk membuat tinjauan ke kilang SK Hynix (pembekal semikonduktor Korea Selatan), pusat pameran Samsung D'light di Seocho-dong, Korea Broadcasting System (KBS) di Suwon serta Pelabuhan Incheon.

Melalui lawatan ini, para peserta mendapat pendedahan dan penerokaan ilmu terutama yang berkaitan dengan teknologi kejuruteraan di Korea di samping meningkatkan kemahiran insaniah serta semangat keusahawanan dalam menjayakan matlamat ekspedisi pendidikan.